

隨

園

隨

筆

隨園隨筆卷八

錢塘袁枚子才

官職類

中

唐宰相皆非本官故有同三品同平章事之稱

唐初以侍中尙書令中書令共議國政爲宰相皆三品官也後因太宗爲尙書令臣下避之遂用僕射爲尙書省長官又因其品位既崇不輕授人乃以他官居宰相之職如魏徵以秘書監李勣以太子詹事俱各參預朝政其人雖入相而其官未至侍中中書故必加同中書門下三品名目若三司三公中書令則不必加此銜然當時亦有官侍中中書令而不爲宰相者大歷以後升

侍中中書爲二品嗣後入相者便無此稱矣太宗時僕射李靖以病辭位詔疾小瘳三兩日一至中書門下平章事遂有平章事之稱後用資望稍輕者遂又有同中書門下平章事之稱開元以後常領他職如用兵則爲節度使崇儒學則爲大學士急財用則爲鹽鐵使頗有類於今之兼部務者唐制官極尊不過三品其太師太傅等名乃贈官耳

宋宰相不專任

宋承唐制宰相不專任三省長官尙書門下並列于外而別置中書禁中號政事堂以同平章事爲宰相有二

人則分日知印或爲某館大學士監修國史亦因唐以

來三大館皆宰相兼故也後以文潯公爲太師呂公著  
守司空復有平章軍國重事之稱或五日或兩日一朝  
非朝日不至都堂至韓侂胄拜相乃以平章軍國事爲  
名去重字則所預者廣去同字則所任者專

### 宋正官不治事

宋三省六曹二十四司類以他官主判雖有正官非奉  
別勅不治本司事故中書令侍中尙書令不預朝政侍  
郎給事中不領省職諫議無言責起居不記注天下財  
賦悉隸三司而中書省不知其盈虛出入也大槩分而  
爲三一日官不過寓祿秩敘爵位而已一日職所以待  
文學之選一日差遣方辨治內外之事故士以登臺閣

爲顯官而不以官之遲速爲榮滯以差遣要劇爲貴途  
而不以階勛爵邑有無爲輕重時人語曰寧登瀛不爲  
卿寧抱槩不爲監

宋三師三公最濫

宋初趙普爲太師以其開國元勳也元祐以文彥博爲  
太師以其四朝耆舊也後童貫爲太師是以奴隸爲帝  
師矣越王偲鄆王楷爲太傅儀王樞肅王樞爲太保是  
以子弟爲保傅矣宣和末三公至十八人三少不計其  
數荆王元儼號二十八太保以其年才二十八也

唐翰林待詔甚尊

明皇置翰林院待詔以張說陸堅等爲之寧四方表奏

批答又置翰林供奉與待詔分掌誥勅後改名學士禮  
遇甚親至號稱內相非若今之待詔也

明按察使可以答知府

明史雍泰爲山西按察使怒太原知府尹珍不避道答  
之珍訴于朝王恕爲寬其罪乃降湖廣參議蕭鳴鳳以  
兵備副使督學廣東以憤杖肇慶知府鄭璋璋恚投劾  
去言官交章論之蕭坐降調

宋恩蔭最濫

宋一后妃一大臣之子弟親屬皆有恩蔭有官至二十  
餘人者晏殊不乞恩澤而薨後仁宗猶官其孫及甥等  
九人其他郊祀行慶羣官率多進職真宗時司諫孫何

奏貢部上名動踰千計門資入仕亦及百人每祀園耶  
並加銓敍使評事寺丞才數載而通閩籍贊善洗馬不  
十年而登臺郎若十年之內肆赦相仍必至京僚過于  
晉徒朝臣多于州縣請降詔書自今郊祀羣官一例不  
得遷陟

省臺寺監府衛院之分

唐楊收曰總羣臣而聽曰省分務而治曰寺省者中書  
省尚書省門下省是也臺者御史臺司天臺之類寺者  
太常寺太僕寺之類監者都水監尚方監之類衛者羽  
林衛鑾儀衛之類府者折衝府都督府之類院者樞密  
院集賢院之類皆今之衙門也

令勅格式之分

禁於未然之謂令施於已然之謂勅設於此而使彼至之之謂格設於此而使彼效之之謂式

稱呼越等之禁

淳化元年國子祭酒孔維上言中外文武官稱呼假借踰班越等請一切禁斷太宗命學士宋白議白請自今文武臺省官並呼本官如太常博士大理評事不得呼郎中諸衛將軍未領刺史者不得呼太保供奉官以下不得呼司徒

巡撫稱中丞

秦有御史監諸郡漢興省之漢御史大夫有二丞一掌



圖書秘籍一外督部刺史明之巡撫皆帶御史銜故至今稱巡撫曰中丞

唐宋散階

唐宋文散階二十九從儀同三司特進光祿大夫起至將仕郎而止武散階四十五從驃騎大將軍起至陪戎校尉而止唐以開府爲散階見李涪刊悞

唐宋封婦人四品稱君

唐宋封婦人一品母妻爲國夫人三品以上爲郡夫人四品爲郡君五品爲縣君助官四品有封者爲鄉君

宋史官制排班給俸最詳

官制莫詳於宋史有合班給米祿等條合班如開寶六

年詔晉王位望俱崇宜位在宰相上太平興國八年楚王廣平郡王出閣詔宰相立親王之上其餘班次上下載之甚詳祿賜有給鹽給麪給炭給馬芻給紙給僦人衣糧給公用錢茶湯錢并絹羅等名目公用錢自節度使兼使相至有給二萬貫者赴任川陝者給驛券赴閩粵者給倉券皆至任所則止車駕巡幸從者中書樞密三司使給館券

職田

唐制內外官各給職田做三代圭田之制賜大夫而不稅其租北齊一品以下公田有差元魏宰人之官有公田宋咸平中令檢校官庄及遠年逃亡田悉免租稅分

給兩京大藩府及州縣長吏畝數各有差

### 學政

古人舉士皆由郡府無所謂學政也宋諸路設監司一員提舉學校歲巡所部察師儒優劣其時或置或罷元世祖設各道儒學提舉司正副二員掌州府學校考較明初生員入學由巡按御史布按兩使太祖使宋濂王禕爲江南江西儒學提舉洪武十九年又以駙馬都尉梅殷提督山東學校亦偶然之事正統元年始設各省提學南北直隸用監察御史他省用按察司副使或僉事本朝用明制其副使僉事稱學道惟北直以翰林爲之方稱學院

縣尉上表巡檢賜勅

漢縣令權重故尉亦權重縣以丞尉爲二卿而主簿不與焉則尉固尊于主簿也唐人高常侍集有謝封即縣尉表是尉得上表也按通考尉掌兵原與今尉不同猶之巡檢在宋初爲典兵之要職明初巡檢帝賜勅書琴辛雜記楊璉真伽之黨祖傑姦橫已極枉殺俞氏七人州縣受賄不理平江錄事司移文巡檢司爲白其寃則元時之巡檢權亦重矣日知錄云巡檢裁而總督設此豈今之巡檢哉

剽圓

通考宋太祖升驍勇爲上軍以老弱爲剽圓掌官觀掃

除之役非但簡羸卒亦且省冗食也剩圓二字恰奇

丞遷尉

漢制丞尊于尉至今皆然王嘉傳嘉爲掾察廉爲南陵丞復察廉爲長陵尉又似尉尊于丞則以縣之大小故也

宋宮觀不必往其處供職

神宗置宮觀之職取漢祠祝釐之義所以優賢逸老王安石惡異議之人亦以此處之閒散之地雖曰提舉主管某宮觀實不往供職也故奏請者多以家貧爲詞降旨則曰依乞差某處宮觀任便居住惟京師宮觀不許外居始則員缺甚少後乃不限員數並差知州資序人

以三十日爲一任

唐宋官放假日多

唐宋京朝官遇元旦寒食中和天慶上元之類卽放假  
休沐又有旬休之例文昌雜錄載一年中放假有七十  
六日故包拯奏每節假七日廢事頗多請只給五日此  
風至明而絕

隋制從駕官許帶家眷

隋宇文述出兵詔憐其老許帶家累自隨北齊書裴澤  
夫妻相愛澤從駕其妻自輦而至

用兵可以乘輜

韋叡乘肩輿在軍中指揮須知禹山行用輜卽今之肩

輿也見史記河渠書又見于淮南王諫伐南越書

藩司臬司

梁沈約齊安陸昭王碑文曰夷羣戎路求入奉靈輿藩  
司抑而不許此藩司初見史冊之文然李善竟未注何  
官唐人文集中所稱藩垣藩岳者皆節度之通稱韋蘇  
州詩方知大藩地豈曰財富强蓋節度乃上州刺史從  
三品中州下州刺史皆正四品分上階下階故皆可稱  
至於臬司二字不見史冊惟元世祖至元十四年奕赫  
抵雅爾丁爲建康道肅政廉訪司始視事見獄具列庭  
下怵然曰凡逮至臬司皆命官及有出身之吏得情卽  
服罪無用刑具此臬司初見史傳之文其濫觴則藩字

見于毛詩臬字見于康誥耳

快手內外班

宋書蕭慧開傳慧開自京口請假還都與蔡興宗相逢于曲阿興宗見慧開有劔十餘事力二三百人皆低頭直去問之不答所謂事力者今之快手也快手二字見宋書黃回傳回募江左快手八百以隸麾下劉劭百官志所云衙前散從則今之內外班矣又宋書王鎮惡傳西將及能細直東快手有二千餘人又建平王景素傳左右勇士數千人並荆楚快手

藩司稱方伯臬司稱廉使

方伯二字見于王制分天下爲左右曰二伯又曰天子



使其大夫二人監于方伯之國國三人此方伯最尊後世廢封建所云方伯者刺史也漢何武曰刺史古之方伯上所委任南齊張敬兒爲雍州刺史稱方伯今以藩司爲方伯者借稱也按察使則唐時已有睿宗景雲間改巡察使爲按察使宋仁宗以轉運使爲按察之官楊察歷江南東路轉運使專以舉官爲急務曰此按察職也宋之按察蓋主巡察別有提點刑獄則轉運判官爲向遼聖宗命尙書劉京等分路按察刑獄此按察爲刑官之始金章宗承安四年始改提刑司爲按察使司元世祖又改爲廉訪司今人稱臬司爲廉使本此

罰俸

唐制品官犯流罪以下聽贖由笞十贖銅一斤遞加而增但云贖不云罰也亦有云罰者唐元和五年房式有不法事罰俸召還宋刑法志有奪俸一月之說金史刑志載罰俸一月選舉志則云奪俸兩月三月明史曰祖制凡朝會失儀者下鎮撫司獄杖之萬厯時改爲罰俸

### 直隸

直隸二字見宋史直隸省三字見元史宋趙普傳普與帝謀令節鎮所領州郡皆直隸京師得自奏事不屬諸藩于是節度使之權始輕元地理志序曰唐以前以郡領縣而已元則有路府州縣四等大率以路領州州領縣而又有腹裏之名腹裏者一中書省統理燕南山東

山西河南河北諸路之地也行中書省十有一而中書省只一焉其地有以路領府府領州州領縣者而府與縣又有不隸路而直隸省者至本朝則以直隸爲一省之名

### 宰相有印

方密之謂古宰相無印支俸皆借翰林院印此但指明之大學士而言若唐宋宰相皆有印也且有分日知印之法其印文曰中書門下印元中書令丞相皆銀印明大學士本無宰相之名然亦未嘗無印明史內河銀印直紐方一寸七分厚六分篆文曰文淵閣印但文移却借用翰林院印而不用此印密之蓋知其一不知其二

也 本朝大學士無印文移用內閣典籍廳印卽明之  
翰林院典籍也明閣臣多由翰林故典籍卽爲內閣之  
屬今改典籍隸內閣而翰林別設典籍其制稍變

### 翰林有印

翰林院明時爲五品衙門銅印 本朝升爲從三品衙  
門銀印其屬典籍簿亦有印惟講讀以下官無印

### 檢校

唐初所謂檢校雖非正授却辦本職事如檢校侍中檢  
校中書令檢校納言檢校左相之類皆列于宰相表與  
真授者無別而宇文士及檢校涼州都督魏元忠檢校  
并州長史亦是實履其地內外官各有檢校若今署事

者然中葉後諸將以軍功得檢校官從此三公三師僕射尙書車載斗量有名無實故唐書宰相表三公三師七十一人而檢校之公師不與焉猶使相之不列于宰相也自公師兩僕射六尙書兩散騎常侍太子賓客祭酒水部員外郎外罕有除檢校者宋史所列檢校官司有九王建由檢校太師遷司徒曹僧以檢校太師守司徒又數年始除太保然則檢校太師尙在真三公之下也三公三司有旣軒受冊之禮若檢校則不行冊拜矣

### 行守試之分

行守試三者因官階與職任之高下而分長編元豐四年詔自今除授職事官並以寄祿官品高下爲法高一

品者爲行下一品者爲守二品以下爲試品同者不用  
行守試字樣柳公權符璘碑其題云輔國大將軍行左  
神策軍將軍輔國大將軍階正二品左神策將軍階從  
三品此高一品爲行之証也其署銜云朝議大夫守尙  
書工部侍郎朝議大夫階正五品侍郎官職正四品此  
下一品爲守之証也五代時李琪爲宰相有所愛吏當  
得試官琪改試爲守遂爲同官所糾此試不如守之証  
也富弼呂公著之守司空與蔡京之司空皆真三公也  
而京不加守字則尤貴矣明以來階品與官品同遂不  
必用此三字

判知之分

判與知有分春明退朝錄云品同爲知品隔爲判宋初曹翰以觀察使判潁州蓋用隔品爲判之例後來惟輔臣及官僕射以上領州府事稱判其餘皆稱知不稱判也大抵以大押小曰判平等曰知

權發遣

宋法判知之外又有云權發遣者則因其資輕而驟進故於其結銜稱權發遣以示分別王安石秉政時最多此官程大昌演繁露云以知縣資序隔二等而作州者謂之權發遣以通判資序隔一等而作州者謂之權知宋制六曹尚書從二品而權尚書則正三品待郎從三品而權侍郎則從四品是權知與知亦有分別東坡以

端明殿朝奉郎學士知州事差遣也端明殿學士職也朝奉郎則其寄祿官也差遣罷而官職尙存職落而官尙在非有大罪則士大夫無一日儕于編氓之禮古之優臣工者如此至明太祖始法重而思殺焉

### 落致仕

元祐元年文彥博落致仕加太師平章軍國重事路公本以守太師致仕今復召用故有落致仕之命同一落也落職則爲罷免落致仕則爲復用其云落者謂結銜內去此字也元豐三年彥博落兼侍中除守太尉蓋其時方改官制以侍中中書令爲宰相職事官非退閒者所宜授故落侍中而加太尉以寵之亦非罷免之謂



一字王

通史有一字王之稱蓋如趙王魏王之類皆國王也若郡王則必二字如混同郡王蘭陵郡王之類較一字王爲卑

同知稱司馬

古同知兩字非官名元史張礎同知轉運使余闕同知副元師皆不過叅佐之義而其結銜仍在下某官也稱某府同知蓋自明始矣司馬一官在兩漢並非郡僚乃與兵之官續漢書百官志將軍之下有司馬一人其領軍皆有部曲部有軍司馬一人曲有軍候一人又有軍假司馬假候別部司馬諸名目今人得漢印其篆文在

往有之皆將軍之屬領兵者非郡守之貳也郡守之貳有丞有長史而已刺史之下有從事有掾史而已皆無司馬也魏晉以降除刺史者除單車刺史外必加將軍都督軍事故僚屬有司馬之名而隋唐因以司馬爲郡佐今人呼同知爲司馬或以此故歟

通判別駕

宋太祖去藩鎮乃設通判以監諸州刺史刺史惡其捉搦故云願有螭螭而無通判處然其結銜皆云通判某州軍州事無單名通判兩字者直云某處通判亦自明始矣東坡通判杭州寄子由詩云杭州別駕無功勞其時蓋已有別駕之稱漢制刺史之屬吏有治中從事別

駕諸官皆州自辟除秩止百石較之縣令爲卑而魯子敬稱士元非百里才使處治中別駕之任始得展其驥足者蓋爾時州牧專制一方幕府元僚得參生殺予奪之權權重于縣令故耳通典云別駕者謂隨刺史之後別駕一車以行也

元宰相太多

左氏舜舉十六相相者相佐之義非宰相也古只一相商之伊尹漢之蕭何是也惟元宰相最多馬亨上疏言宰相至十七員失之冗雜宜加省汰其時中書省有左右丞相有平章政事有右丞左丞有叅知政事皆稱宰輔而秉政者丞相也平章間有一二人用事者右丞以

其任漸輕丞相非蒙古色目人不得爲漢人而爲平章者只王文統李孟而已左丞以下始參用漢人然終元之世南人不得入中書也阿合馬爲尙書平章政事求升中書右丞相亦丞相尊於平章之証也

### 元皇后最多

僞漢劉聰周天元皆有皇后數人元代四幹耳朵俱有皇后六七人大抵其時稱皇后者不必正宮猶之皇子皆稱太子宗女悉稱公主也所云幹耳朵者猶之華言大營盤第二營盤也北周書之所云大呼藥小呼藥或卽是此義耶

### 宰相稱相公相王

宰相稱相公始於王粲粲從軍詩曰相公征關右是時曹操自領三公又爲丞相故也嗣後相而不公公而不相者多矣晉簡文帝以會稽王作相故又稱相王

入粟官元價最貴

入粟補官元初無之天歷年間始行之因旱故也然折鈔每石八十兩一千五百石才得從七品是七品官業已金十餘萬兩矣

魏都督卽刺本州

北魏都督幾州諸軍事卽爲本州刺史周改都督爲總管而其制不殊如秦州總管卽爲秦州刺史是也惟王謙爲益州總管又別有刺史達奚恭韋孝寬代尉遲迥

爲相州總管又別以叱利長文爲相州刺史與舊制不同大抵六朝郡有太守州有刺史刺史有都督監督之分又有使持節假節之分都督爲上監督次之使持節爲上假節次之不假節者卽單車御史矣

魏制官有汎階

北魏官有汎階張普慧傳言之甚詳似是各官普造一級故曰汎恰有汎前汎後之分

叅軍記室行軍司馬等官

晉刺史開府後才有叅軍記室等官叅軍主兵記室主文此外掾史甚多至唐節度使乃有行軍司馬其權頗重可以推爲畱後昌黎爲襄度司馬故平淮西碑不無

假借處

某郡相

漢諸侯王有傳相有內史景帝裁內史而專屬之于相沿至魏晉凡有封王處猶有內史其所稱某郡相者卽某郡之太守邑令也以其人加公侯銜便專稱某郡相而不稱某郡守令矣

蔭

古官有蔭非止蔭其官並蔭其子孫之罪唐律義疏載之甚詳今俗語王子犯法庶民同罪者明律也

奪一官

古所云奪一官者奪其一官而餘官尙存也至除名而

後與庶民等矣凡奪官有以罪免者有改其印綬者有削其秩俸者宋韓縝官侍制知秦州以小罪杖殺指使其家訴寃乃落職分司南京所謂落職者落其知秦州之職而天章閣侍制之官猶存故得分司南京



隨園隨筆卷九

錢塘袁枚子才

官職類

下

宰相乞郡

宋宰相出知一府一州非貶降也所以均勞逸也以某官出知者猶今之學政或以侍郎爲之或以編修主事爲之其官大小不同其任學政則一

明叅將遊擊非守土官

前明之叅將遊擊皆欽差官與督撫同非守土官也守土官惟布按兩司與都指揮都指揮者今之都司也

寄祿散官

宋初官制有寄祿之稱漢唐未有所謂寄祿者如尚書侍郎給事諫議諸卿監郎中員外郎之屬皆有其名而不任其職謂之寄祿官以爲敘遷之階而已所謂散官者則勛封功臣食邑之類徒爲文具無足重輕者也元豐以後又以尚書侍郎等皆爲職事官而以舊所置散官爲寄祿官如金紫光祿大夫猶前之吏部尚書也銀青光祿大夫猶前之五部尚書也正議大夫猶前之六部侍郎也朝請朝散朝奉猶前之諸曹員外郎也皆寄其本銜之祿而遷轉予奪之與外官之俸無與也東坡以工部屯田員外郎知湖州罷官後又以朝奉郎知惠州知惠州者其現任而員外郎朝奉郎則其寄祿

也

公卿三變而稱寺稱少

隸續曰漢百官志太傅上公一人太尉一人居三九之官者均不加以公卿之字以公卿名其官自蕭梁始余按六朝以前無稱司徒公太僕卿者此一變也然只稱太僕卿鴻臚卿不兼稱衙門也至明朝乃有太僕寺卿鴻臚寺卿之稱是兼帶其衙門稱之又一變也今俗稱又有太僕寺正卿鴻臚寺正卿之稱以自別于少卿是三變也

宋有就差勾當之稱

曹武惠王平江南歸赴宮門只稱勾當某事已畢人嘉

其不伐蓋爾時稱勾當者卽今之幹辦也余見宋縉雲  
縣城隍廟碑後題名一稱文林郎就差權處州縉雲縣  
尉一稱勳功郎就差縉雲縣令管勾勸農公事又一稱  
將仕郎縉雲縣丞某而已其不稱就差者是本職官也  
其既書就差又加一權字者是資格之最輕者也大抵  
宋元人書官銜最繁不似今之省也古人階秩之尊卑  
與其現任官不必配合不似今之文林郎七品知縣亦  
七品也

選法三變而至掣籤

儲六雅先生云漢晉間重尚書選部黃散以下皆得銓  
注然至北魏崔亮之停年格而選法一變至唐裴行儉

之長名榜而選法再變至明孫丕揚富平人行掣簽法而選法又一變

古調官非今調官

漢書十年不調顏師古注調選也蓋陞遷也今之調簡漢人謂之換薛宣傳以平陵之薛恭換鉅鹿之尹賞是也

判官非通判

凡唐宋稱爲某府判官者幕府之官非通判也崔璞守蘇州辟皮日休爲軍事判官是也通判有監州之責其權大如狀元蔡齊除將作監通判交州是也

特進非官

鄧禹拜右將軍後左右二將軍罷乃以特進奉朝請特進者特異乎衆而許其進見之稱非官名也

巖郎非尚書郎

漢羽林中郎將用六郡良家子孫補以便馬從獵還宿殿陛巖下室中故號巖郎是巖郎者武職之稱非郎官也荀綽百官表注云巖者取其巖肅整銳之義若然則曰巖郎亦可

賜爵

史記趙孝成王使趙勝受韓使者馮亭之地吏民皆益爵三級惠帝元年民有罪得爵三十級免死應邵曰一級直錢二千大事記載普賜天下民爵自惠帝始後漢

書注劉劭曰春秋不更庶長已見商鞅修其法爲十八級合關內侯凡二十等百官表一級曰公士二日上造三曰簪衰四曰不更五曰大夫至關內侯而止有罪者得贖貧者得賣與人高祖詔吏善遇高爵明于文定公不解其制以爲屢遇厚恩天下將無百姓方密之以爲所賜者不過鄉老里長輩雖曰民非平民也唐劉知幾言具僚九品每歲遇赦必賜助階以致緋服多于青衣象版多於木笏此庶官加爵而不及平民之証也宣帝求漢初功臣之後復其家史稱皆出庸保之中及考之表則或云公乘簪衰或曰公乘上造大率皆有爵者爵至五大夫才得復其身庶長左更則二千石之勤事者

往往得賜皆漢法也王仲宣集有爵論云依律有奪爵法今爵事廢矣奪之民不懼賜之民不喜是空設文書而無用也又曰爵自一級轉登十級而爲列侯譬猶秩自百石轉遷而至于公也近世賞人不由算級從無爵人封爲列侯原其所以爵廢故也古者白起衛鞅皆稍進爵爲五大夫客卿庶長以至於侯非一頓而封也魏了翁古今考曰漢武功爵者造士良士元士戎士樂卿軍衛之名與秦異買者試補吏先除千夫如五大夫猶近世進功郎登仕郎之類各有價也宋天禧元年登州學究鄭巽出粟五千六百石賑飢詔補三班承信郎嗣後沿以爲例然州縣官不許接坐只令廷叅而已大抵



民賜爵如今老農給八品頂帶之類官賜爵如給本身封典之類俱不甚貴重

漢俸米多錢少

漢百官俸米多錢少三公俸月三百五十石減至令史而月猶入石開元二十四年定百官俸一品月三十千遞至九品月一千九百此則論錢矣北漢劉崇傳宰相月俸百緡較之今日猶多一倍鄭端簡曰祿輕自宋始也惟地封之典至宋而隆大父如父母古未曾有

予告賜告有別

漢予告賜告有別予告者許歸家三公予告令也賜告者不得歸家病滿三月賜告恩也大抵賜告如病假之

類馮野王病滿三月賜告與妻子歸茂陵就醫大將軍  
王鳳劾其不敬

持節使持節假節有別

漢之持節有三曰使持節得殺二千石以下曰持節得  
殺無位人曰假節惟行軍得殺犯令者皆刺史也唐武  
德元年改郡爲州改太守爲刺史亦加號持節

舍人

顏師古曰舍人者供役使之人史記嫪毐幸時諸客求  
爲舍人者以十數李斯亦爲呂不韋舍人蓋親近左右  
之通稱也至六朝而權傾天下茹法亮以舍人出爲司  
農而泣

給扶仗侍之分

常見岑文本畫古帝王像一帝之側必有左右二人擁侍而立者亦復冕而貂蟬但止三旒非若天子之九旒不解其制朱萬同曰此魏晉六朝所謂給扶是也宋猶行之故陳康伯傳許肩輿至殿門仍給扶或曰天子無給扶之說旁侍立者卽侍中也故戴貂蟬余按陳書驍騎之職天子臨軒則升殿仗侍韋翹爲俠侍將軍又大行皇帝靈座有俠御人或岑所畫者其卽此歟

衙門當作吾門

說文衙字讀語音不作牙音故漢碑多寫衙爲禦楚詞道飛廉之衙衙亦然漢吾字乃作牙音如允吾騶吾金

吾之類百官箴以金吾爲吾臣蓋衙臣也天子朝羣臣曰正衙庭見曰衙參走卒曰衙官牙將皆從木吾而起金吾木吾者棒也伍百執之以參于前者見古今註

上衙門三日

今州縣初到任必具刺上衙門三日在上官到任則下屬亦往具刺候起居三日不解所自始唐岑參爲虢州上佐有衙郡守還一詩自註衙者今監司郡守初上事既受官吏參謁至晡時僚屬復同于客次胥立廷下通刺曰衙以聽進退之命如是者三日如主人免此禮則翌旦又通謝刺蓋自唐已然矣

三考出身

三考者試流外之官一曰書二曰計三曰時務蓋較之  
試進士科之身言書判僅少其一耳見六典元史選舉  
志吏三考者或以三十月爲一考或以四十月爲一考  
大德元年以百二十月爲一考蓋舊以九十月爲滿也  
三考出身爲正七品

### 大夫亦有三朝

古今考曰天子有五門三朝三朝者內朝路朝外朝也  
玉藻曰路寢聽政退適小寢路寢者大寢也正寢也此  
云諸侯亦有三朝也今之州縣大廳正寢也小廳小寢  
也別府堂宅燕寢也是大夫亦有三朝也

### 歷代職官數目

漢官制七千五百員唐萬八千員宋三萬四千員前明  
成化五年武職已逾八萬合文職十萬餘員見明史劉  
體乾傳中

典史授都御史

明初典史授都御史賈士授布政使秀才授尚書見明  
史姜埰傳陳啓新疏中

印

璽書二字見左傳季武子以璽書追而與之周禮司關  
凡達貨賄者以璽節傳出之璽卽印也戰國時已用印  
蘇秦佩六國相印項羽剗印而不以與人漢高帝弄御  
史大夫印而顧趙堯其來久矣王伯厚云棄符節而用

印始于周顯德六年想符節廢于周耳非印始于周也  
漢晉官員替代皆別鑄印惟尉只用一印見晉書孔琳  
之傳琳之請桓元無改鑄印省金炭之費

省會二字借用

省者禁署也漢昭帝紀帝姊長公主養省中蔡雍曰本  
爲禁中避元后父名故曰省中師古曰省察也言入此  
中者當察視也唐書百官志曰官司之別曰省曰臺今  
稱省會者借用也唐以中書門下尚書爲三省宋元以  
中書省爲宰相所專治元末署中書分省於濟寧彰德  
諸路設叅知政事又置行中書省于江西江浙山陝等  
處添設平章與真相等明興分天下爲十三中書省未

幾改爲十三布政司從此以官署爲地名而有十三省之說會者天官司會註大計也聽出入以要會天官之職也禹南巡時會計天下賦稅周公營洛四方民大和會而後世遂相因爲省會之名

府道二字借用

府文書藏也非官也論語魯人爲長府太公立九府圖法周禮天官府六人尙書六府三事允治漢有少府樂府皆非官名趙禹傳文深不可爲大府諸葛亮傳開府治事方漸漸有官名之意然亦非州郡名也唐初只京兆河南二府而已後武后升并州爲太原府明皇升蒲州爲河中府自唐升大州爲府而地理志始有府州之



名然惟建都者稱府宋真宗嘗爲襄王仁宗嘗爲慶國公故升襄陽慶州爲府至元明而統縣者皆曰府矣道路也非官也自唐分天下郡縣爲十道又增爲十五道而明遂因之有巡道糧道僉事道兵備道之名

在家食俸

今優禮大臣有在家食其原官之俸者按後漢書鄭均傳均遷尚書以病告歸元和二年帝東巡過任城幸均舍勅賜尚書祿以終其身號白衣尚書是大臣在家食俸之始

革職留任

今大臣革去頂戴仍令在官辦事按晉書陶侃傳侃刺

荊州討杜曾戰敗免官王敦表以侃白衣領職再討杜  
弢成功復還原官是卽今之革職留任矣唐劉仁軌征  
百濟亦白衣從軍

聽事吏

今州縣有聽事吏按隋書百官志開皇時因州縣之大  
小置白直以供役此卽今之聽事吏矣

頂馬

今貴人街行前有騎馬者一二人號稱頂馬按國語越  
王勾踐親爲吳王前馬前馬者卽今頂馬矣

掌扇腰扇

今貴人街行有持大扇遮太陽者號掌扇按通鑑褚淵

引杜預尚高陵公主主亡泰始中追贈公主而元凱不  
加駙馬之官嬾真子以爲駙馬者始于魏武寵何晏以  
御馬之副給之志恩也宋神宗治平四年詔駙馬不許  
升行蓋唐以後子弟一選駙馬便與父叔齊行李遵場  
崇矩之孫尚真宗女御筆升遵勤爲崇矩之子繼昌之  
弟繼昌者其父也升之與父同行所以避舅姑之尊也  
其無禮亦甚矣內府秘典言明代駙馬不選公卿子弟  
多用畿輔少年及武弁世家所以然者駙馬受制於公  
主之嫡母出入有時起居有節萬厯再駙馬受嬾母箠  
殺死而公主不敢救已而反目逃回罰來演禮革其父  
職帝亦悔之宋史開慶初宰相請以進士第一人尙主

時周震炎中狀元而主從屏後窺之不悅其貌乃別尙  
楊鎮理宗事也余道男女相悅爲婚理宗亦自有理宋  
章獻太后爲仁宗選后有王氏者國色也太后嫌太妖  
詭不宜少主乃另選郭后非仁宗意卒至廢黜後王氏  
所適者死仁宗傳旨封爲夫人許入禁中適富弼作相  
格詔不行見揮麈錄

隨園隨筆卷十

錢塘袁枚子才

科第類

進士稱名

唐舉進士科卽自稱進士不必登科而後稱及第後遇未及第時題名進士則添一前字於其上蓋唐時爲進士而不及第者多也宋進士有四甲五甲朱文公乃紹興十八年五甲進士故王封亭題其題名牌云若使當年無五甲先生未免落孫山朱子小名沈郎亦載碑中

進士出身

唐人爭取新進士衣裳以爲吉利故張文昌詩曰歸去

惟將新誥命後來爭取舊衣裳唐宣宗自稱鄉貢進士  
李道隆進士之榮至於天子慕之宋時尤重出身無出  
身者不得入相故欲相此人必先賜同進士出身而後  
許其入相其重如此然亦有時而賤者李贊皇不中進  
士故不喜科目曰好驟馬不入行金衛紹王喜吏員不  
喜進士曰高廷玉人材非不佳可惜出身不正以其中  
進士故也

糊名印卷排坐位

漢所謂設科射策者嘗其所試於策而投射之卽糊名  
之濫觴唐吏部試選人皆糊名武后以爲非用人之法  
罷罷之此所云糊名者用之於選人而非用之於考試

也考試糊名積通考以爲始於魏臺侍郎魏元同宋淳  
化三年蘇易簡知貢舉仍糊名考校後遂爲例卷上加  
印五代會要以爲始于晉清泰三年命諸生試卷加監  
試官印以防真僞排坐號宋會要以爲始于大中祥符  
四年令諸位列坐號號曰混榜元選舉志舉人試時無  
故不冠及擅移坐次者並扶出每舉子一名着性薛友  
一人看守大抵防弊之法至後代而愈嚴

### 搜檢改沐浴

搜檢之法不知何始然讀舒元真疏云士子入場自攜  
脂燭聽候唱名搜檢等語是搜檢亦始于唐也杜牧李  
飛墓志飛赴試問吏唱名熟視符驗勃然曰國家如此

待賢耶士受如此之待而猶自以爲賢耶遂不試出所  
謂符驗亦搜檢類也唐肅宗時中書舍人李揆請試進  
士於庭中設五經諸史請恣尋檢曰迂學陋生菲枕圖  
史亦不能自措于詞今取士不考實徒搜禁所挾甚無  
謂也國史補云拔藏入試謂之書策似乎唐時懷挾之  
禁猶寬宋端平元年御史李鳴復奏嚴懷挾請懸賞募  
人告捉余考金史太和元年省臣奏搜檢法太嚴裂衣  
袒體殊非待士之禮請設一沐浴所命諸生浴官爲製  
新衣著之以防夾帶似此法甚佳

文章自註出處

金明昌元年令舉人程文所用可自註自處



真籍貫年貌三代

宋咸淳辛未正言陳伯文議考試士子諸路連司牒州縣先置士籍編排保伍取各人戶貫三代年甲書明所習經書年十五以上實能文者許自召其鄉之貢士結狀保送一樣四本分送縣州漕部臨唱名時重行編排保伍且俾各人親書家狀以爲筆迹之驗由是後世士子未入場時先投試卷填寫本身籍貫年貌三代首親書一通

唐宋進士選官不過簿尉

通典唐舉人條例四經出身授緊縣尉五經出身授望縣尉是唐時進士初除不過縣尉也然非試吏部得用

則終身布衣并不釋褐韓文公所以三選無成而受張  
建封之辟宋進士選官亦不過主簿程明道中進士爲  
鄆縣主簿令以其年少輕之是也今進士非授庶常卽  
改主事縣令驟貴實始于明

進士許讓

宋薛簡蕭初舉進士爲州第一讓其里人王嚴而居其  
次茅鹿門疑進士何得讓不知唐宋凡舉子皆稱進士  
其中殿試者謂之及第出身宋制解試雖有主文考校  
而鄉舉里選之意猶存故得讓此說見南雷文定

給燭

唐制試日許燭燭二條晉長興二年改令蠶試竇貞固

請復給燭

膳錄

宋景德四年定親試進士條例試卷付編排官去其卷首鄉貫狀別以字號第之付彌封官膳寫枝勘八年始置膳錄院官蓋宋初膳寫彌封只一官後分爲二

許帶書冊

長慶元年禮部侍郎錢徽知貢舉放進士鄭朗等三十人段文昌言其不公上詔制誥白居易覆試居易奏云向例禮部試進士例許用書冊兼得通宵得通宵則思慮必精用書冊則文字不錯昨覆試之日書冊不容一字木燭只好兩條迫促驚忙幸皆成就可知唐試進

士許帶書冊也所駁放盧公亮十人以題是孤竹管賦不知本於周禮故也

貼出

金章宗時試者漏寫詩題下注字不取特賜及第元選舉志有試卷不考格犯御名廟諱及塗注一百五十字以上者不考不考卽今之貼出也

鹿鳴宴

今鄉試放榜有鹿鳴宴不知何始昌黎送楊少尹序曰揚君始冠舉於鄉歌鹿鳴而來是唐時已有此制漢何武以童子歌鹿鳴入選則是替人歌耳

瓊林宴

今宴進士曰瓊林按唐摭言云新進士尤重櫻桃宴疑  
卽今之瓊林也唐進士宴名甚多有大相議宴主司之  
父母也次相議宴主司之偏侍也有小相議宴主司之  
兄弟子姪也間喜宴敕士宴也最大者曰團宴卽曲江  
宴也至于朋僚賀酒謂之燒尾宴虎化人惟尾不化必  
須燒之故引以爲喻一云新羊入羣必爲諸羊所觸火  
燒之則定見摭言及封氏聞見錄又曰魚躍龍門必電  
燒其尾

館選教習散館

宋紹聖初令進士純用經義而改置宏詞一科於進士  
登科後試之取不過數人卽今之館選也庶吉士之選

洪武乙丑擇進士爲之永樂十三年選六十二人而宣德二年見選一人以故宏治四年給事中余旦以累科不選度吉士請復祖制大學士徐溥請新進士錄平日所作文十五篇呈之禮部送翰林考訂而按號行取之再糊名試之中者爲度吉士謂之館選以翰詹資格深者課之謂之教習三年學成者授編檢次者爲給事御史謂之散館

宋制科三等最尊

宋故事制科分五等一等二等皆虛設空名而已以下三等取人惟蘇軾兄弟以才高得入三等而子由爲胡武平所駁仍降爲四等此外吳正肅公有育亦得三等

三場雖定八月而試期可改

天寶十三載舉人問策外加詩賦帖經爲三場通考以爲始於武后神龍元年宋高宗建炎三年第一場考詩賦經義二場論一道三場策一道舊例諸州試舉人以八月選日韓魏公以葆子由病改八月爲九月紹興二十四年定期用中秋日四川則用季春元豐初以省試春寒展至二月朔卜日殿試於四月上旬今所行者始於元仁宗從李孟之請三歲一開科八月溽試明春二月會試中書策之於廷賜及第出身有差以蒙古色目爲右漢人南人爲左各命一題三甲進士只與入品官

射策對策之分

匡衡射策不中至九乃中丙科其經以不中科故明習大抵漢舉人由博士者用射策爲問難疑義書之冊而令人射之也由州郡舉者用對策顯問以經義政事而令占對也

時文八股

時文二字初見考工記量銘曰時文思索允臻其極此二字斷章取義實始於此宋文鑑有張庭堅經義二篇皆是尙書題其文有似平論卽當日王荆公所定格式也歐公云天聖間予舉進士見學者務以言語聲偶摘裂號曰時文是時文者乃指進士之詩賦也元仁宗皇慶三年定考試程式蒙古色目人第一場經問五條大



學論語孟子中庸用朱子章句漢人第一場與蒙古同  
惟於卷尾作一大結以已意結之限三百字第二三場  
增古賦詔誥等賦樣蒙古人能漢試者加一等用明太  
祖與劉基又酌定四子書文倣宋經義方代古人語氣  
而爲之體用排偶謂之八股考兩朝選舉志則是時文  
之體濫觴於宋行於元而大定於明

場規

今所行場規始於皇慶三年既定考題復定場規凡犯  
御名廟諱及塗註五十字以上者不准謄錄凡錄正文  
用硃書計所塗註幾字對讀無差皆標寫字數卷首書  
三代年貌籍貫用印鈐縫場內毋得喧譁違者治罪試

官漏洩試題者治罪貢士懷挾者治罪

南北分卷

隋唐初無南北分卷之例唐武宗會昌五年定舉士人等所送人數其國子監明經每年送二百人進士三十人其隸名明經亦送二百人其鳳翔山南西道東道等處進士母過十五人明經母過二十人其河東陳許等道進士母過十人明經母過十五人是以地分科目之多少唐已然矣宋太宗又別立分數考京東京西陝西河北河東等處五路舉人亦因北人拙于詞章之故歐公因溫公欲均攤南北故奏言南人百中取一北人十中取一又言南人好文故進士多北人尚質故明經多

蓋袒南人也馬端臨亦頗以爲是洪武丁丑考官劉三吾取宋琮等五十二人多南士帝怒所取之偏竄三吾於邊親自閱試取任伯安等六十一人多北士也洪熙元年乃命楊士奇定取士之額南人十分之六北人十分之四宣德間又分爲南卷北卷中卷以百人爲率南取五十五名北取三十五名中取十名中者四川廣西雲貴及廬鳳二府是也嘉靖常曰天下都是朕的秀才有何冒籍之禁南北之分然祖宗成例已定不能改也

### 額限

額數歷代多少不同唐時進士有十九名者張籍吳孟寂詩十九人中最少年是也有三十二人者陳標詩文

字一千重馬擁喜歡三十二人同是也宋太宗夸得賢之盛放五百餘人薛居正諫太濫不聽宣和中放至八百餘人洪武十七年詔鄉試不拘額數從實充貢洪熙元年方有定額其後漸增南北直隸定至百名

主考

隋唐有京師主試官無各省秋試官至宋始有漕試類試胄試之名淳祐三年命淮南州郡附鎮江秋試淮西州郡附建康秋試蘄黃光三州安慶府附江州秋試三試所各增差試官二員別項考校照各州元額取放疑此卽外省主考之始明初外省主考用教官故有不在朝列屢主文衡者景泰二年令布按二使同巡撫推舉

見任教官爲考官以致監臨官屢奪其權嘉靖聽張璉之請方遣京官翰林部科等官每省二人而教官之用漸少萬曆四年用知縣分校而校官愈絀矣

舉人貢士歲貢拔貢

漢章帝建和元年詔曰朕每尋前世舉人貢士或起畝畝不由問閔此舉人貢士之名所由始也歲貢二字初見董仲舒傳臣愚以爲使諸列侯郡守歲貢吏民之賢者各二人明初因之凡貢生入監必由生員選擇命各學選文理優者歲貢一人故謂之歲貢其後但取食廩年深者宏治中南京祭酒章懋言歲貢挨次多衰廢者乞令提學行選貢之法不分廩增附生員學優年富者

通行考選選貢卽今之拔貢矣前明有遇覃恩而選者謂之恩貢今亦間有之

周易生

南史徐孝克少爲周易生徐玠以周易生舉高第所謂周易生者豈當時專設周易一科取士如漢所稱一經博士而他經無科取殊不可解

蔭生

漢儀注二千石以上任滿三年者得任同產若子一人爲郎蘇武劉向是也宋諸妃公主遇聖節得奏有服親一人

賜同進士出身

王圻續通考以賜同進士出身始於紹興余按宋史選  
舉志太平興國三年殿試得呂蒙正以下一百九人越  
二日覆試諸科得二百人並賜及第又聞貢籍得十舉  
以上十五舉以上者一百八十餘人並賜出身九經七  
人不中格者憐其老得賜同三傳出身景德四年又定  
考第爲五等而臨軒唱之一等二等曰及第三等曰出  
身四五等曰同出身并有賜同學究出身者後高宗憐  
蜀士路遠其赴廷試不及者亦賜同進士出身偶然紹  
興四年之特恩非常例也

恩科有二說

日知錄言恩科始于宋開寶三年詔禮部闈進士十五

年以上會終場者司馬浦等賜出身祥符八年詔進士六舉以上雖不合格並奏賜出身以此爲恩科蓋本宋史選舉志也余考石林燕語聞見錄俱以爲恩科始于富鄭公當國時與段希元同場屋相好不欲私之故別立恩科所以避嫌也似與選舉志又小異

見座師

新唐書選舉志舉人既及第綴行通名詣主司第謝各序立西階下北上東向主人席東階下西向諸生拜主司答拜今之座主見門生每坐東切西猶古禮也李衛公不喜進士故奏門生只許一見而止其參謁期集尚江進名皆罷之



禁稱門生

梁宋兩太祖御試進士懲唐季之弊不許稱門生於私門

武學武狀元

漢六郡良家子爲羽林期門甘延壽張次公以之出身南齊崔祖思請開文武二學曰大廟之南宏修文序司農以北廣開武教皆武學之先聲山堂考索云宋仁宗慶曆三年置武學既而中止余按封氏見聞記開元十九年置先師太公廟配以張良大學士張紉請立武監此武學之始也神宗熙寧五年樞密請建武學於武成王廟使文武官知兵者教之亦分三舍用之八年詔武

舉與文學同時鎖試于貢院後亦中止高宗紹興十六年又特建之射不中者不許試程文其馬步弓石與今畧同此後忽行忽罷元史選舉志工匠陰陽醫巫皆有科而獨無武舉洪武二十年亦立武學成化十四年從太監汪直請設武科鄉會試崇禎時倪元璐請殿試傳臚一如文例于是崇禎四年以王來聘爲武狀元前此但有及第出身無武狀元之稱也饒州府志載朱虎臣九歲爲宋高宗武狀元考宋史不過天子試之補承信郎賜金帶耳非狀元也

武舉進士

山堂考索以武舉始于宋慶厯按冊府元龜漢元延元

年詔北邊二十二郡舉勇猛知兵法者一人武后長安  
二年詔每郡舉習武者如明經進士法行鄉飲酒禮送  
兵部此武舉之始嗣後郭子儀中翹闕負米科宋慶元  
五年定解額以後遂稱武舉進士

### 覆試

續通考以覆試始于唐元和中覆試侍郎錢徽所舉進  
士不知東漢黃瓊傳左雄前議舉吏廉先試之于公府  
又覆之于端門此爲覆試之始白居易覆試錢徽所舉  
黜盧公高等十人白敏中覆試王起所舉放楊巖一人  
新唐書選舉志高祖詔諸州明經秀才俊士進士爲鄉  
里稱者縣官考試州長重覆歲隨方物入貢舊唐書王

起傳貢舉猥濫勢門子弟交相酬酢寒門俊造十棄六七及元稹李紳在翰林深怒其事故有覆試之科宋石曼卿亦覆試落第

禮闈

開元七年考功員外郎李昂爲舉人詆呵帝以員外郎望輕乃移貢舉于禮部以侍郎主之禮部選士自此始見新唐書選舉志

官卷

宋初公卿子弟防其請托遂艱于進取范杲魯公兄子也見知陶穀實儀皆待以甲科會有言世祿之家不宜與寒士爭科名者杲遂不敢赴試李宗諤以文正公故

亦唱名時辭疾文正罷相方登科慶歷時詔官人別立  
一額于是進取者始寬見石林燕語

回選

宋制秋貢春試皆別置頭場以待舉人之避親者自總  
麻以上及婚姻皆燂送惟臨軒策試謂之天子門生雖  
父兄爲考官亦不避嘉定元年命朝官有親屬赴廷對  
者免差充考校大約避親者七人取一其額甚窄故朝  
士之被差爲考官者慮妨其親不願差試士子亦有隱  
身匿名不認親戚以求免者

拔解

外府不試而貢者曰拔解見國史補大抵卽免解也

監生

太學生始于漢元朔二年儒林傳載之詳而明制入國學者通謂之監生舉人曰舉監生員曰貢監蔭生曰蔭監捐資曰例監太祖取其英敏者爲小秀才明道者爲老秀才馬后置米紅倉養其妻子未娶者賜其婚聘一旦擢用便至布按兩使其犯法者乃謫選遠方典史今之監生望典史如登天則是景泰元年納粟入監誤之也然生員伍銘入監其價至米八百石矣鄒幹所奏也

監生考職

監生應事始于洪武五年建文時定考挨法上中下三等上等選用中下等歷一年再考用亦不拘品級如丞

樂五年選三十八人隸翰林院習四夷譯書是也

### 增廣生附生

郡學之設與太學相峙創立自唐始唐太宗增廣生員此增生之所由名也宋置諸州路學官元頗因之至明而極盛宣德年增廣太祖之原額又于額外附之謂之增生附生

### 宗學

紹興十四年始建宗學于臨安生員額百人教授一員在學者皆南官北宅若子孫及親賢宅近屬則別選館職教授宋史宗室傳叔韶以宋子賜進士及第仁宗喜以爲古未有也想慶厯嘉祐其時尚無宗學歟

學田

宋熙寧初命諸州置學官率給田十頃贍士觚不觚錄曰太祖制田存學中及國子監中非止飯生徒兼爲刻書費也故今書坊有監本之名

鎖廳

宋現任官應進士試曰鎖廳言鎖其官廳而往應試也雖中止遷官而不與科第不中則停現任陸游蔭補登仕郎鎖送第一秦檜孫埴第二秦怒爲黜有司見宋史  
充場儒士

明鄉試許童生入場謂之充場儒士中則竟稱舉人不中仍歸州縣試大槩學政兩司先考試而后取以入場



名數亦不多也

翰林秀才

楊一清巴陵人少能文以奇童荐爲翰林秀才成化命內閣擇師教之余嘗戲云可對武后之先天太后老聃母也

殿試難題

殿試出題問孔子七十二賢賢賢何德雲臺二十八將將將何功此因永樂四年莆田陳竇與林環爭狀元朝廷故出此以難之見姚園客露書

五狀元

宋張伯紀自本州試貢士次公試次內舍校定次上舍

合格次升補上舍上等皆第一徽宗以爲五狀元見是  
齋日記

特賜科名

開寶三年詔進士六舉以上者雖不合格特賜科名七  
十八人景祐元年詔進士五舉年五十以上者不合格  
亦以名聞寧波府志宋太祖閱鄉舉之士屢試禮部不  
第詔貢士十五舉以上者徑赴殿試授以郡縣教職謂  
之特奏名恩例嗣後減至四舉五舉卽得奏名蓋初或  
一歲二歲一試後則定爲三歲一試也此說見嚴氏劄  
記

行取之始

天順間以科道缺人取內外科目出身三年考滿者考選之內則兩京五部主事中行評博外則推官知縣其自外入者謂之行取其有特荐者不拘俸滿之例

### 傳衣鉢

邵伯溫聞見錄古人所謂傳衣鉢者不在名次之前後只以已前中第之名次與之唐和凝及第時名在第十三後于闐中愛范質之文遂以十三名處之所謂傳衣鉢也後官位果一一相同人傳爲佳話

### 溫卷

唐人有溫卷之說蓋先以文字呈先達也宋沿唐制亦許貢士先呈公卷後因無行者多假他人文字或傭人

代書故景德中限舉人于試紙親書家狀如公卷字迹  
不同並行駁放賈昌朝曰唐人不糊名而採名故有溫  
卷之說今場屋有彌封之例則此例可以不行矣

老先生

漢書賈誼傳河南守吳公聞其秀才每詔下諸老先生  
未能言誼爲之對弇州觚不觚錄明代稱老先生最尊  
門生稱座主不過稱老先生而已自江陵當國門生方  
有老師之稱外省司道稱巡撫曰老先生稱按院曰老  
先生大人

獻書得官

大中祥符八年獻書者十九人悉補三班賜出身乾德

四年彭幹涉弼亦以獻書賜科名

古稱狀元不必第一名

唐鄴谷登第後宿平康里詩曰好是五更殘酒醒耳邊  
聞喚狀元聲按谷登趙昌翰榜第八名非第一也周必  
大有回姚狀元穎啟回第二人葉狀元適啟似凡新進  
士皆得稱狀元

古稱探花不必第三名

天中記唐進士杏園初會號探花宴以少俊二人爲探  
花使遍遊名園若他人先折名花則二人被罰蔡寬夫  
詩話云故事進士朝集擇年少者爲探花使熙寧中始  
罷之是探花者年少進士之職司非必第三名也

翰林不必文人

唐制乘輿所在必有文學之士與醫卜一切供奉之人直別院待詔故道士吳筠奕手王叔文方士柳泌俱命待詔翰林是在翰林者不必盡文人也今之翰林院待詔猶存此意唐制自宰相而下無宣詔之禮惟學士宣詔蓋學士院在禁中非內臣宣召無由得入故也

狀元無定官

呂蒙正擢進士第一授將作監丞通判昇州後蔭其子將依盧多遜之例授水部員外郎蒙正奏曰臣忝甲科及第止授九品京官臣男不應受此寵命乞以臣釋褐時官補之可見宋初狀元只授九品京官也然儒林公

謠言宋狀元極尊登第不滿十年卽望擢用如王曾陳堯叟皆是也尹洙言狀元及第雖使將兵十萬凱歌勞還其榮無以加焉宋史亦言國初狀元可以十年作相頗多名臣自王安石立經義改新法葉祖洽迎合之遂中狀元從此士風大壞而朝廷待之亦薄余按開寶八年王嗣宗爲狀元授秦州司戶參軍忤知縣路冲冲械繫之于獄馬涓入幕府自稱狀元呂大忠折之曰狀元者及第未除官之稱也旣爲判官則不可自稱是宋初狀元不過幕府之職亦不甚尊太平興國時改授大理評事通判諸州八年第一甲授知縣與推官孝宗時汪應辰狀元授鎮東簽判光宗時陳同甫狀元及第授建

安府判官廳公事理宗時王十朋狀元授紹興簽判燕翼貽謀錄云宋初狀元傳臚皆自備鞍馬大中祥符八年詔進士第一人給金吾七騎前引爲之傳呼與同列者異始于蔡齊旋除將作監通判兗州然則狀元在宋時亦無一定之官

狀元與同年交拜

宋選舉志新進士朝謝後拜黃甲共儀注設褥于貢院堂上東西向皆再拜拜已擇榜中年長者一人狀元拜之復擇最少者一人拜狀元所以重年好也

對花召

文文山文集云宋故事狀元賜袍笏與聞喜宴各刻題



名小錄一月後率同榜謝恩闕下曰門謝謝後狀元授承事郎某軍節度判官廳公事至後一科放進士榜則前一科狀元召入爲秘書省正字名曰對花召。

修撰

今狀元授翰林院修撰修撰之名始于唐張昌齡爲北門修撰

典史中狀元

明代先作典史後中狀元者曹鼐也先作教官後中狀元者翁正春也見明史本傳

唐重進士輕明經

通鑑唐重進士輕明經王凝與姨母弟彥昭同舉進士

疑先及第袂衣見彥昭曰君何不舉明經此後遂爲深仇潘好禮之子舉明經好禮惡之柳其子于縣門明經之輶至于如此然昌黎贈張童子云明經試禮部者歲三千人能貫串者須十年之久亦非易事也

賸榜

宋人以殿試二名爲榜眼工部郎中陳若拙無文才而中第二人號賸榜

元榜有正副

康熙間國子監祭酒吳璘潭在都於啟聖祠土中掘得元碑三一爲正泰園子貢試名記蒙古色目漢人列三榜皆有正副一爲至正十一年進士題名記蒙古色目

爲一榜狀元朶列圖漢人南人爲一榜狀元文允中皆  
無榜眼探花一爲至正國子中選題名記蒙古賜正六  
品色目賜從六品漢人賜正七品亦有正副三碑其制  
蒙古人加優色目人一等色目人加優漢人一等契丹  
女真皆稱漢人色目人三十種皆所征取部落也詳輶  
耕錄

主司在院而榜自外來

據言鄭顥爲主司託崔雍爲榜至榜除日待榜不至但  
遣奴壽兒來云來早走賀壽兒寄宿院中夜已艾壽以  
蠟丸進卽榜也主司在院榜自外來亦奇

舉子自定狀頭

杜黃門第一榜第三場庭參之際謂諸生曰未有榜帖奈何尹樞年七十餘趨而進公欣然延之乃授以紙筆每劄一人則抗聲斥其姓名列庭間之無不嘆其公道惟定其元曰非老夫不可公卽命筆親自劄之狀頭竟出于舉子自定尤奇亦見據言

### 童子科

漢太史試學童能諷書九千字以上乃得爲史後漢取年幼才俊者拜童子郎若黃琬黃香張堪任延皆是也在唐則劉真李泌張童子宋則楊億晏殊皆是也孝宗淳熙元年女童林幼玉求試中書後省批試所誦四十三件經書並通詔封孺人然此後亦無所表見

副榜

古無副榜正榜之分但有甲科乙科之別今之副榜似是古之乙科順帝至正八年中書省奏准監學生員每歲取及分生員四十人三年應貢會試者一百二十八人除例取十八人外再取副榜二十人時謂之鄉試備榜

科名記

今鄉會試有進呈錄蓋起于唐宣宗裴庭裕東觀奏記云上好文學尤重科名大中十年鄭顥知貢舉宣宗索科名記顥采武德元年以後及第人姓名及所試詩賦題目編次奏之後其書不傳故新舊唐書絕無記錄

通籍

漢制司馬一人守宮門記公卿之年貌號曰門籍以通其出入太后除寶嬰門籍使之不得奉朝請王嘉爲郎坐戶殿門失闕免蓋一時稽考之悞

大比

周禮五家爲比黨正以歲時蒞較比注如今小案比也漢以八月筭人亦案比而造籍故今鄉試號大比